АЖРИМ

(даъво аризасини кўрмасдан қолдириш тўгрисида)

Ромитан тумани

2024 йил 16 сентябр

Ромитан туманлараро иқтисодий суди, судья Н.Зоировнинг раислигида, судья ёрдамчиси Н.Рашидов котиблигида, даъвогар — Шофиркон туман фермер, деҳқон ҳўжаликлари ва томорқа ер эгалари Кенгашининг «АСЛОН» фермер ҳўжалиги манфаатида жавобгар — «WBM ROMITEX» масъулияти чекланган жамиятидан жами 240784000 сўм ундириш тўғрисидаги даъво аризаси юзасидан қўзғатилган ишни даъвогар вакиллари — Ж.Сафаров, Р.Жумаев ва М.Миркуловлар (ишончнома асосида), манфаати кўзланган шахс — фермер ҳўжалиги вакили Ф.Аслонов (ишончнома асосида) жавобгар вакили — Н.Ярашов (ишончнома асосида) иштирокида Ромитан туманлараро иқтисодий суди биносида очиқ суд мажлисида кўриб чиқиб, қуйидагиларни

аниклади:

даъвогар — Шофиркон туман фермер, деҳқон хужаликлари ва томорқа ер эгалари Кенгаши иқтисодий судга «АСЛОН» фермер хужалиги манфаатида даъво ариза билан мурожаат қилиб, жавобгар - «WBM ROMITEX» масъулияти чекланган жамиятидан 240784000 сум зарар (бой берилган фойда)ни ундиришни сураган.

Суд мажлисида иштирок этган даъвогар вакиллари ва манфаати кўзланган шахс вакили даъво аризасини қўллаб-қувватлаб, даъво аризасидаги важларни такрорлаб, хусусан, "Аслон" фермер хўжалиги ва "WBM Romitex" масъулияти чекланган жамияти ўртасида 80,9 тонна пахта хом ашёси етказиб бериш юзасидан 2023 йил 10 январда 14-сонли фьючерс шартномаси тузилганлигини, шартномага асосан жавобгар бўнак маблағлари хисобидан 76540800 сўмлик томчилаб суғориш тизими учун шланг етказиб берганлигини, етказиб берилган шланг сифатсиз бўлганлигини, пахта экилган майдонни томчилаб суғориб бўлмаганлигини, буни туман хокимлиги ва тегишли ташкилотлар хам тасдиклашини, суднинг хал килув қарори билан жавобгардан сифатсиз шлангнинг қиймати ундириб берилганлигини, сифатсиз шланг сабабли, агротехник талабларга асосан экилган пахта майдони суғорилмай қолганлиги сабабли, режалаштирилган 80,9 тонна пахта ўрнига 51,1 тонна пахта етиштирилганлигини, натижада 29.8 тонна кам пахта етиштирилиши оқибатида 240784000 сўм зарар кўрилганлигини, яъни шунча микдорда фойда бой берилганлигини, даъвоагр даъво талаблари микдорини 240784000 сўмдан 208295967 сўмга камайтириш тўгрисида ариза такдим этишини, уни иш юритувга қабул қилиб, даъво талабини тўлиқ қаноатлантиришни сўрашди.

Суд мажлисида иштирок этган жавобгар вакили даъво талабини тан олмаслигини, даъво талаби асоссизлигини, сифатсиз шланг кийматини даъвогар ундириб олганлигини, даъвогарнинг ўзи хозирги кунда 209484121 сўм микдорида карздор эканлигини, даъво аризасини каноатлантиришни рад этишни сўради.

Суд, тарафлар вакилларини тинглаб, иш хужжатлари ва даъвогарнинг даъво талаблари микдорини камайтириш тўгрисидаги аризасини ўрганиб чикиб, куйидагиларга асосан даъвони кўрмасдан колдиришни, даъвогарнинг давлат божидан озод этилганлигини инобатга олишни ва олдиндан тўланган почта харажатини унинг зиммасига колдиришни лозим деб топади.

Суд мухокамаси ва иш хужжатларидан аникланишича, даъвогар – «АСЛОН» фермер хужалиги (шартнома матнида "Хужалик") ва жавобгар – «WBM ROMITEX» масъулияти чекланган жамияти (шартнома матнида "Буюртмачи") ўртасида 2023 йил 04 январда пахта хом ашёси ва уруғлик пахтани етказиб бериш ва харид килиш буйича 14-сонли фьючерс шартномаси тузилган.

Шартнома шартига кўра "Хўжалик" "Буюртмачи"га 2023 йил ҳосилидан 23.1 га майдонда 80,9 тонна пахта хом ашёси етиштириб топшириш, "Буюртмачи" эса маҳсулотларни ҳабул ҳилиб олиш ва унинг ҳаҳини тўлаш мажбуриятини олишган.

Даъвогар 2023 йилда жавобгарга шартномада белгиланганидан 29,8 тонна кам, яъни 51,1 тонна пахта хом ашёси етиштириб топширган. Жавобгар томонидан даъвогарга томчилаб суғориш тизими учун сифатсиз шланг етказиб берилиши натижасида пахта майдонларини суғоролмаганлиги оқибатида 29,8 тонна кам пахта хом ашёси етиштирилганлигини важи билан даъвогар 240784000 сўм бой берилган фойда ҳисоблаб, уни жавобгардан ундиришни сўраб, даъво аризаси такдим этган.

Ўзбекистон Республикаси Иқтисодий-процессуал кодекси 157-моддаси биринчи қисмида даъвогар ишни биринчи инстанция судида кўриш чоғида ишнинг мазмунан кўрилиши якуни бўйича чиқариладиган суд хужжати қабул қилингунига қадар даъвонинг асосини ёки предметини ўзгартиришга, даъво талабларининг миқдорини кўпайтиришга ёки камайтиришга ҳақли эканлиги белгиланган.

Даъвогар — Шофиркон туман фермер, деҳқон ҳўжаликлари ва томорқа ер эгалари Кенгаши суд ариза тақдим этиб, даъво талаблари миқдорини 208295967 сўмга камайтиришни маълум қилган.

Ўзбекистон Республикаси Иқтисодий-процессуал кодекси 155-моддаси биринчи қисми 2-бандида даъво аризаси имзоланмаган булса ёки уни имзолаш хуқуқига эга булмаган шахс ёхуд мансаб мавкеи ёки фамилияси, исми, отасининг исми курсатилмаган шахс томонидан имзоланган булса, судья даъво аризасини қайтариши белгиланган.

Суд муҳокамасида аниқланишича, даъвогарнинг даъво таллаблари миқдорини 208295967 сўмга камайтириш тўғрисидаги аризаси Кенгаш раиси У.Умаров ўрнига чизиқча билан унинг ўринбосари М.Раҳмонов томонидан имзоланган, буни даъвогар вакиллари ҳам тасдиқлашди.

Демак, даъво талаблари микдорини камайтириш тўғрисидаги даъвогарнинг аризаси қайтарилиши лозим.

Ўзбекистон Республикаси Иқтисодий-процессуал кодекси 107-моддаси 3-бандида даъво аризаси имзоланмаган бўлса ёки уни имзолаш хукуқига эга бўлмаган шахс томонидан ёхуд мансаб мавкеи ёки фамилияси, исми, отасининг исми кўрсатилмаган шахс томонидан имзоланган бўлса, суд даъво аризасини кўрмасдан қолдириши белгиланган.

Суд мухокамасида аникланишича, даъво аризаси Шофиркон туман фермер, дехкон хужаликлари ва томорка ер эгалари Кенгаши раиси У.Умаров имзоси олдига чизикча куйилган булиб, даъвогар вакилларининг маълум килишича, ушбу имзо У.Умаровга тегишли булмай, унинг уринбосари М.Рахмоновга тегишли булиб хисобланади.

Демак, мазкур ҳолатда даъво аризаси имзолаш ҳуқуқига эга бўлмаган шахс томонидан имзоланганлиги сабабли, уни кўрмасдан қолдириш лозим.

Ўзбекистон Республикаси Президентининг 2017 йил 10 октябрдаги "Фермер, деҳқон хўжаликлари томорқа ер эгалари фаолиятини янада ривожлантириш бўйича ташкилий чора-тадбирлар тўғрисида"ги ПҚ-3318-сонли Қарорининг 3-бандида

фермер, деҳқон хужаликлари ва томорқа ер эгалари манфаатларини кузлаб судга давлат божи туламасдан даъво аризалари, давлат ва хужалик бошқаруви органлари, маҳаллий давлат ҳокимияти органларининг қарорлари, уларнинг мансабдор шаҳслари ҳатти-ҳаракатлари (ҳаракатсизлиги) устидан шикоятлар тақдим этиш, бунда даъво аризасини қаноатлантириш рад этилганда манфаати кузлаб даъво аризаси киритилган фермер, деҳқон ҳужаликлари ва томорқа ер эгаларидан давлат божи ундирилмаслиги белгиланган.

Юқорида баён этилганлардан келиб чиқиб, суд даъво талаблари миқдорини камайтириш тўғрисидаги аризани қайтаришни, даъво аризасини кўрмасдан қолдиришни, даъвогарнинг давлат божидан озод этилганлигини инобатга олишни, оддиндан тўланган почта харажатини унинг зиммасига қолдиришни лозим деб топади.

Ўзбекистон Республикаси Иқтисодий процессуал кодексининг 107, 155, 157, 195-196-моддаларини қўллаб суд,

Ажрим қилди:

- 1. Даъвогар Шофиркон туман фермер, деҳқон хўжаликлари ва томорқа ер эгалари Кенгашининг даъво талаби миқдорини 208295967 сўмга камайтириш тўғрисидаги аризаси қайтарилсин.
- 2. Даъвогар Шофиркон туман фермер, деҳқон ҳўжаликлари ва томорқа ер эгалари Кенгашининг "Аслон" фермер ҳўжалиги манфаатида жавобгар «WBM ROMITEX» масъулияти чекланган жамиятидан 240784000 сўм бой берилган фойда (зарар)ни ундириш тўғрисидаги даъво аризаси кўрмасдан қолдирилсин.
 - 3. Олдиндан тўланган почта харажати даъвогар зиммасига қолдирилсин.
 - 4. Даъвогарнинг давлат божидан озод этилганлиги инобатга олинсин.

Ажрим устидан бир ойлик муддат ичида шу суд орқали Бухоро вилоят судига апелляция тартибида шикоят бериш мумкин.

Судья Н.Зоиров

